

"Cherus" im Muttenger Luftschutz
(21.6.45)

Me darf jetz wieder schrybe
und säge was me will;
Was no e rächte Schwyzer
dä blybt jetz nümme still.
Ihr werdet drum verneh,
was ich ha ghört und gseh.
Ich hoff bestimmt -
Dass wäge dämm mich niem uf d'Hörner nimmt.

S'isch schad, mir hei kei Musig
in euser Kompagnie.
Do wär der Lütnant Mesmer
mit Lyb und Sell derby.
Er würd's gwüss gern probiere,
im Luftschutz z'dirigiere.
Ich glaub er spannt -
scho lang uf Luftschutzmusig-Aspirant.

S'hett no zue alle Zyte,
bequemi Herre geh.
Chansch dorum au im Luftschutz
vo dene Vögel gseh.
Im Meister isch's zum Lache,
Däm muesch der Tschumpel mache,
s'nimmt eim nur wunder,
dass dä s'Hinder sälber putzt.

Wenn mir tünd exerziere,
im Kompanieverband,
tuet eus der Guldi schlauche,
-es isch e wahri Schand.
Me cha si grossi Röhre,
im ganze Muttez g'höre -
s'tönt wie im preussische Kasernehof.

Im Schuelhus wird logiert,
der Hauptma lut plagiert.
Der Gmeindrot stellt ihm's Bei;
er wird erbärmlich chlei,
chunnt gänzlich us der Fassig,
droht sofort mit Entlassig,
doch si Gebrumm -
G'heit euse Gmeindrot niemols um.

Der Lütnant Albi het
schier Tag und Nacht kei Rueh.
Er will e neuu Mütze
wo's Dach luegt ufezue.
Ich glaub däm fehlt e Schrube,
chauf doch e Bickelhube -
Denn bisch die reinschti Volkssturmrarität.

Der F.-Trupp git, s'weiss jede
in letzter Zyt viel z'rede
s'hett scho mänge brave Ma
dodore Buchweh g'ha.
Tuesch du im Bunker sitze,
g'spürsch plötzlich dini Hitze,
do chunsch in Schwung -
und wirdsch als alte Esel wieder jung.

Isch eine in sim Läbe
e liederlige Gsell,
so gseht me bim Durchleuchte
miseel e schwachi Stell,
im Walti Dill si Pumpi,
vertrait halt kei so Gumpi.
Ich mach kei Schund -
s'wär Zyt für die in Hoffnigsbund.

Rucksch i als Oberländer,
so macht's sich bsunders guet;
sitz uff dim dicke Schädel -
der Zivilistehuet.
Focht's däwäg afo spucke
vom velle Pfäfferschlucke.
Isch's nit e Splin -
Vielmehr e Fall für d'Medizin.

Es stoht im Greisealter
der Walti Buser scho.
Doch het er no vor Torschluss
der Rappel übercho.
Er het zwar Päck, oh je,
s'brucht kei Herr Lütenant meh.
Mach drum die W.K.
künftig bi der Heilsarmee.